

**Wanita Umno Dan MCA Tampil Hulur Bantuan Kepada Bayi Kepala Besar
Bernama
26 April , 2012**

ALOR SETAR, 26 April (Bernama) -- Penderitaan seorang bayi berusia setahun, Nurul Huda Jannati Abdullah yang mengalami masalah kepala besar atau penyakit 'bilateral open lip schizencephaly' mendapat perhatian Skwad Sayang Wanita Umno Alor Setar dan 1MCA Foundation.

Ketua Wanita Umno Alor Setar Sharifah Maznah Syed Kassim berkata pihaknya dan MCA yang simpati dengan nasib bayi tersebut bersetuju untuk membawa bayi tersebut ke hospital swasta bagi mendapatkan rawatan yang lebih baik.

Katanya kedua-dua sayap itu akan berbincang dengan pihak hospital swasta di negeri ini terlebih dahulu dalam masa terdekat sebelum dapat membawa Nurul Huda untuk mendapatkan rawatan.

"Walaupun Nurul Huda tidak boleh melakukan pembedahan disebabkan faktor usia yang muda, kami akan berusaha untuk mendapatkan rawatan yang terbaik agar air dalam kepalanya dikurangkan serta otaknya berkembang," katanya ketika melawat bayi tersebut di Flat Seri Gemilang, Mergong di sini hari ini.

Sharifah berkata beliau juga telah bertemu dengan pihak Jabatan Kebajikan Masyarakat (JKM) baru-baru ini bagi membolehkan bayi tersebut mendapat bantuan sewajarnya seperti keperluan barangan harian.

Orang ramai yang ingin menghulurkan bantuan untuk meringankan bebanan keluarga itu boleh menghubungi Zaini di talian 017-5408179 atau melalui akaun Bank Islam milik ibunya (Azimah Ahmad) bernombor 02011020683926.

---BERNAMA

Hakcipta © 2012 BERNAMA

Source: <http://www.bernama.com/bernama/v6/bm/newsindex.php?id=661990>